

20 AUG 2001

Smart-Pendidikan

PENDIDIKAN BERPERANAN TINGKATKAN PELABURAN, KATA SITI HASMAH

Oleh: Mikhail Raj Abdullah

KAMPALA, 20 Ogos (Bernama) -- Menyedari pentingnya pendidikan dalam mempertingkatkan pelaburan langsung asing (FDI), Malaysia sedang mempercepatkan usaha meningkatkan keupayaan rakyatnya menerima pemindahan teknologi dan turut serta secara aktif dalam proses perindustrian, kata Datin Seri Dr Siti Hasmah Mohd Ali.

"Perubahan dan pembaharuan pendidikan di Malaysia dilakukan bukan secara kebetulan tetapi dirancang dengan teliti dan dibuat selaras dengan perubahan keperluan masyarakat," kata isteri perdana menteri semasa perbincangan oleh Kumpulan Isu Sosial pada Dialog Antarabangsa Perkongsian Pintar 2001 Global di Pusat Peranginan Speke di Munyonyo, kira-kira 15km dari sini.

Yang turut hadir pada perbincangan itu ialah wanita pertama Uganda Janet Museveni.

Ketika menceritakan pengalaman Malaysia, Dr Siti Hasmah berkata kolej, universiti dan institusi pengajian tinggi yang lain berusaha melahirkan tenaga kerja yang cekap, berdisiplin dan sangat mahir dengan nilai etika dan moral yang mantap serta komitmen untuk berjaya.

"Rakyat Malaysia dilengkapi dengan pendidikan dan latihan, dan untuk memiliki kemahiran termasuk keupayaan berkomunikasi," katanya kepada hadirin yang kebanyakannya dari Afrika.

Dr Siti Hasmah berkata untuk memenuhi keperluan ekonomi berasaskan pengetahuan, sistem pendidikan dan latihan diorientasikan semula agar lebih efektif dalam memberi kemahiran selain tumpuan kepada bidang-bidang yang diperlukan oleh ekonomi.

Beliau juga berkata kerajaan memberi keutamaan untuk menyediakan pengetahuan mengenai teknologi maklumat dan komunikasi (ICT) kepada generasi muda agar mereka bersedia menghadapi ledakan teknologi dan komunikasi di masa hadapan.

Selain itu, katanya, usaha sedang dilakukan untuk memantapkan akses wanita kepada ICT di mana latihan formal dan tidak formal dalam bidang seperti literasi komputer dan penggunaan ICT dijalankan bersama oleh kerajaan dan pertubuhan bukan kerajaan dengan tumpuan khas kepada kawasan luar bandar.

Dr Siti Hasmah berkata pendidikan dan kesihatan sangat penting di dalam kecenderungan masyarakat untuk menarik FDI.

Dr Siti Hasmah berkata beliau kagum dengan usaha yang dilakukan oleh pengerusi Persatuan Perubatan Islam Dr Magid Kagimu Salongo dalam menyediakan pendidikan perubatan untuk membendung AIDS terutama di kalangan umat Islam di negara Afrika.

Dr Siti Hasmah berkata Dr Salongo menjalankan kempen untuk mendidik umat Islam agar menganggap penentangan terhadap AIDS sebagai jihad dengan mendapatkan imam-imam terbabit di dalam program itu.

Beliau berkata persatuan itu telah menjemput Malaysia menghantar pegawai perubatan ke satu persidangan antarabangsa mengenai AIDS di sini pada November ini agar mereka dapat berkongsi pengetahuan menerusi latihan dengan penduduk tempatan.

Dr Salongo, katanya, juga meminta beliau menggesa Perdana Menteri Datuk Seri Dr Mahathir Mohamad supaya mempengaruhi negara anggota Pertubuhan Persidangan Islam (OIC) agar mengambil bahagian dalam usaha yang dilakukan oleh persatuan itu.

-- BERNAMA

MR KHY AKD